

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U VISOKOM
Broj: 41 0 K 099603 23 K
Visoko, 09.01.2024. godine

U IME FEDERACIJE BOSNE I HERCEGOVINE

Općinski sud u Visokom, po sudiji Avdiji Avdić uz sudjelovanje zapisničara Sejdić Džemile, u krivičnom predmetu protiv optuženog D.M. zv.“J.“ sin M. iz B., zbog krivičnog djela zloupotrebe položaja ili ovlaštenja iz člana 383. stav 1. KZ FBiH, rješavajući po optužnici Kantonalnog tužilaštva-tužiteljstva Zeničko-dobojskog kantona broj T04 0 KTK 0053328 23 od 23.10.2023. godine, nakon zaključenog glavnog javnog pretresa, održanog dana 09.01.2024.godine u prisustvu Kantonalnog tužitelja Sikira Ešref, i optuženog D.M., donio je i javno objavio :

PRESUDU

OPTUŽENI:D.M., zvan „J.“, sina M. i majke S., rođene S., rođen ... godine u S., nastanjen na adresi ... općina B., pismen sa završenom SSS, po zanimanju šumarski tehničar, zaposlen u JP ŠPD ZDK d.o.o. Z., PJ Šumarija V. na radnom mjestu otpremač, oženjen, otac dvoje djece, vojsku služio, bez činova i odlikovanja, ne vodi se u vojnoj evidenciji, JMBG: ..., neosuđivan,

KRIV JE

što je,

Dana 19.08.2022. godine, na području grada V., iz šume državne svojine zvanoj „K.“, iz Odjela 24, GJ „K.“, u svojstvu odgovorne osobe, iskorištavanjem svog službenog položaja i ovlaštenja koja ima na radnom mjestu „otpremač“, koje je obavljao po Ugovoru o radu zaključen između JP ŠPD ZDK“ kao poslodavca i D.M. kao uposlenika broj UR-17741/22 od 31.05.2022. godine, iako je bio svjestan da postupa suprotno odredbama Pravilnika o organizaciji i sistematizaciji radnih mjesta u JP „ŠPD ZDK“ d.o.o. Z. broj NO-III-4/12 od 12.03.2012. godine, kojim je za njegovo radno mjesto „9. Šumarski tehničar-primač-otpremač“, između ostalog, propisano: „Otprema šumske sortimente pri čemu je odgovoran za količinu i kvalitet otpremljene robe uz koju sastavlja i izdaje otpremnicu“, znajući da će na taj način oštetiti navedeno društvo, što je i htio, prilikom otpreme ogrevnog drveta na kamion štićar registarskih oznaka K04-T-299, dozvolio utovar gotovih šumskih proizvoda sa stovarišta JP „ŠPD ZDK“ d.o.o. Z. i to 18 komada drvnih sortimenata ogrevnog drveta lišćara ukupno 1,78 m³ drvene mase koju nije evidentirao u otpremni iskaz, oštetivši na taj način korisnika šuma JP „ŠPD ZDK“ d.o.o. Z. u iznosu od 130,83 KM, pribavivši korist prevozniku H.M. u tom iznosu,

čime je počinio krivično djelo zloupotreba položaja ili ovlaštenja iz člana 383. stav 1. KZ F BiH.

Pa sud optuženom na osnovu istog zakonskog propisa: te na osnovu članova: 42., 49. i 62. KZ FBiH, i z r i č e,

USLOVNU OSUDU

Kojom se optuženom za počinjeno krivično djelo utvrđuje kazna zatvora u trajanju od 6(šest) mjeseca, koja se neće izvršiti ako optuženi za vrijeme od 1(jedne) godine ne počini novo krivično djelo.

Na osnovu člana 212 st.3 ZKP FBiH, optuženi se obavezuje da oštećenom JP „ŠPD ZDK“ d.o.o. Z. naknadi štetu u iznosu od 130,83 KM, sve u roku od 30 dana po pravomoćnosti presude.

Na osnovu člana 202 stav 1 u vezi sa članom 199. stav 2. tačka g) ZKP FBiH, optuženi je dužan platiti sudu na ime troškova krivičnog postupka u vidu paušala 20,00 KM, sve u roku od 30 dana, po pravosnažnosti presude pod prijetnjom izvršenja.

Objašnjenje

Kantonalno tužilaštvo Zeničko-dobojskog kantona (u daljem tekstu KT ZDK), optužnicom broj T04 0 KTK 0053328 23 od 23.10.2023. godine, optužilo je Duranović Mirzu, zbog krivičnog djela zloupotreba položaja ili ovlašćenja iz člana 383. stav 1. KZ F BiH, (Službene novine Federacije BiH br. 36/03, 37/03, 21/04, 69/04, 18/05, 42/10, 42/11, 59/14, 76/14, 46/16 i 75/17), (dalje u tekstu KZ FBiH,

Optužnica je potvrđena od strane sudije za prethodno saslušanje ovog suda dana : 26.10.2023. godine. Dana 14.12.2023. godine na ročištu o izjašnjenju o krivnji, optuženi D.M. je izjavio da nije kriv za krivična djela koja mu se stavljaju na teret.

Na glavnom pretresu održanom 09.01.2024. godine, prije izvođenja dokaza, optuženi D.M. priznao je krivnju za krivično djelo koje mu se stavlja na teret zloupotreba položaja ili ovlašćenja iz člana 383. stav 1. KZ F BiH, a njegovo priznanje je prema ocjeni ovog suda u saglasnosti sa dokazima u koje je sud izvršio uvid i to: zapisnik o saslušanju svjedoka S.M., sin Š., nastanjen na adresi ..., grad V., D.A., sin D., nastanjen na adresi ..., grad V., Š.E., sin Š., nastanjen na adresi ..., općina K., V.R., sin E., nastanjen na adresi ..., grad V., H.M., sin A., nastanjen na adresi ..., grad V., uvid i čitanje Akt JP „ŠPD ZDK“ d.o.o. Z. broj 03-4851/23 od 05.10.2023. godine sa Ugovorom o radu zaključenog između JP „ŠPD ZDK“ kao poslodavca i D.M. kao radnika broj UR-17741/22 od 31.05.2022. godine, u prilogu, Akt JP „ŠPD ZDK“ d.o.o. Z. broj 03-4915/23 od 13.10.2023. godine sa Izvodom iz Pravilnika o organizaciji i sistematizaciji radnih mjesta za radno mjesto „Šumarski tehničar-primač-otpremač“ – sa opisom poslova i radnih zadataka za navedeno radno mjesto broj: NO-III-4/12 od 12.03.2012. godine i tabelarnim dijelom Pravilnika za PJ „Šumarija“ V. broj 02-XII-61-1/18 od 09.05.2018. godine, Zapisnik Kantonalne uprave za šumarstvo ZDK, Odjeljenje V., broj 05-1-22-47-523/22 od 19.08.2022. godine, Prijava za šumsku štetu, sa procjenom pricinjene štete Kantonalne uprave za šumarstvo ZDK, broj 27/22 od 30.09.2022. godine sa 20 fotografija na 5 listova A4 formata, u prilogu, Zapisnik Kantonalne uprave za šumarstvo ZDK, Odjeljenje V., broj 05-1-22-47-484/22 od 19.08.2022. godine, Izjašnjenje JP ŠPD ZDK broj 03-3824-1/23 od 23.08.2023. godine -Imovinskopravni zahtjev.

Optuženi je u svom iskazu prilikom priznanja krivnje izjavio da mijenja izjavu o krivnji, i da se danas na glavnom pretresu izjašnjava da je kriv. Istakao je da mu je žao zbog svega što se desilo, da se radilo o njegovoj nepažnji, sve u svemu na kamionu je bilo više drva već što je bilo na otpremnici, obećaje sudu, da se to sigurno više neće ponoviti, nije osuđivan, stid ga je što je danas na sudu, izdržava dvoje djece i suprugu, jedini je zaposlen u porodici i moli sud da mu izrekne uslovnu osudu i obećaje da se ovo sigurno neće ponoviti.

Sud je ovo priznanje krivnje optuženog ocijenio kao jasno, iskreno i nedvosmisleno ničim uslovljeno tako da je priznanje optuženog u saglasnosti sa materijalnim dokazima, naprijed navedenim, u koje je sud izvršio uvid, na osnovu čega van svake sumnje proističe da je optuženi ostvario sva bitna obilježja bića krivičnog djela koje mu se stavlja na teret i to : krivično djelo djela zloupotreba položaja ili ovlašćenja iz člana 383. stav 1. KZ F BiH

Po ocjeni suda optuženi je navedeno predmetno krivično djelo učinio direktnim umišljajem jer je bio svjestan svog djela i htio je njegovo izvršenje, a sud je utvrdio da je optuženi prilikom izvršenja krivičnog djela bio uračunljiv, jer predloženim dokazima nije dovedena u sumnju mogućnost optuženog da shvati značaj svog djela i da upravlja svojim postupcima u vrijeme izvršenja djela, te su se u njegovim radnjama stekla sva bitna obilježja bića krivičnog djela zloupotreba položaja ili ovlašćenja iz člana 383. stav 1. KZ F BiH

Prilikom izricanja krivično pravne sankcije sud je cijenio optuženom D.M. kao olakšavajuću okolnost činjenicu da je priznao izvršenje krivičnog djela koje mu se stavlja na teret, čime je u mnogome doprinio utvrđivanju činjeničnog stanja i skraćanju krivičnog postupka, kao i okolnosti koje je optuženi naveo u svom iskazu prilikom priznanja krivnje, te činjenicu da optuženi do sada nije ranije osuđivan. Dok je od otežavajućih okolnosti sud nije našao. Cijeneći utvrđene okolnosti na strani optuženog, sud je optuženom D.M. , za navedeno krivično djelo utvrdio jedinstvenu kaznu zatvora u trajanju od 6 (šest) mjeseci , koja kazna se neće izvršiti ako optuženi u roku od 1 (jedne) godine ne počini novo krivično djelo. Po mišljenju ovog suda izrečena sankcija srazmjerna je stepenu odgovornosti optuženog i težini počinjenih krivičnih djela koja mu se stavljaju na teret, te će se istom postići svrha kažnjavanja, kako sa aspekta generalne, tako i specijalne prevencije predviđena članom 42. KZ FBiH.

Na osnovu člana 212 st.3 ZKP FBiH, optuženi se obavezuje da oštećenom JP „ŠPD ZDK“ d.o.o. Z. naknadi štetu u iznosu od 130,83 KM, sve u roku od 30 dana po pravomoćnosti presude.

Na osnovu člana 202 stav 1 u vezi sa članom 199. stav 2. tačka g) ZKP FBiH, optuženi je dužan platiti sudu na ime troškova krivičnog postupka u vidu paušala 20,00 KM, sve u roku od 30 dana, po pravosnažnosti presude pod prijetnjom izvršenja.

Sudija
Avdija Avdić

PRAVNA POUKA:

Protiv ove presude dozvoljena je žalba Kantonalnom sudu Zenica u roku od 15 dana po prijemu iste, a žalba se podnosi ovom sudu u tri primjerka.